

修訂日期: 2004/10/13 發行日期: 2006/2/2

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 24, No. 1467a

原始資料: 蕭鎮國大德提供, 伽耶山基金會提供, 北美某大德提供

No. 1467

◎佛說犯戒罪報輕重經

後漢安息三藏安世高譯

如是我聞。一時佛住王舍城迦蘭陀竹園。爾時尊者目連。晡時從禪定覺。往至世尊所。頭面禮足却住一面。時尊者大目連。白佛言。世尊。意有所疑今欲請問。唯願聽許。佛告目連。聽汝所問。當為汝說。目連。即白佛言。世尊。若比丘比丘尼。無慚愧心輕慢佛語。犯眾學戒。如是犯波羅提提舍尼。波夜提。偷蘭遮。僧伽婆尸沙。波羅夷。得幾所不饒益罪。唯願解說。佛告目連。諦聽諦聽。當為汝說。若比丘比丘尼無慚無愧。輕慢佛語犯眾學戒。如四天王天壽五百歲。墮泥犁中。於人間數九百千歲。佛告目連。無慚無愧輕慢佛語。犯波羅提提舍尼。如三十三天壽一千歲。墮泥犁中。於人間數三億六十千歲。佛告目連。無慚無愧輕慢佛語。犯波夜提。如夜摩天壽二千歲。墮泥犁中。於人間數二十億四十千歲佛告目連。無慚無愧輕慢佛語。犯偷蘭遮。如兜率天壽四千歲。墮泥犁中。於人間數五十億六十千歲。佛告目連。無慚無愧輕慢佛語。犯僧伽婆尸沙。如不憍樂天壽八千歲。墮泥犁中。於人間數二百三十億四十千歲。佛告目連。無慚無愧輕慢佛語。犯波羅夷。如他化自在天壽十六千歲。墮泥犁中。於人間數九百二十一億六十千歲。時尊者目連聞佛所說歡喜奉行。

爾時尊者目連。即說偈言。

因緣輕慢故	命終墮惡道
因緣修善者	於此生天上
緣斯修福業	離惡得解脫
不善觀因緣	身壞入惡道
比丘謹慎樂	放逸多憂謔
變諍小致大	積惡入火[火*分]
持戒福致喜	破戒有懼心
永斷三界漏	爾乃得涅槃
戒德可恃怙	福報常隨己
見法為人長	眾遠三惡道
戒慎除恐畏	福德三界尊
鬼龍蛇毒害	不犯持戒人
神仙五通人	造世諸呪術

為諸慚愧者 斷諸無慚愧
如來制禁戒 半月半月說
已說戒利益 稽首禮諸佛

佛說犯戒罪報輕重經